

REGIONAL NEWS

HEADLINES:-

1. MLA Pu Lalrintluanga Sailo nizana thi chu an ui thu sawiin, MNF Party chuan an party banpui rinawm a tliak an ti.
2. Larsap Gen (Rtd) Vijay Kumar Singh chuan ram leh hnam inghahna ni mai tur thalaite chu hruaitu tha leh danglamna thlen theitu ni tura an inbuatsaih lawk a tul tih a sawi..
3. Prime Minister Narendra Modia chaun Vice president atanga bang Jagdeep Dhankar chu hriselna tha tak nei chhunzawm turin duhsakna a hlan.
4. Bangladesh Air Force thlawhna chesualah mi 31 an thi a, mi 171 in hliam an tuar.

<><><>

MLA LALRINTLUANGA SAILO DIED

Mizoram Legislative Assembly member, Pu Lalrintluanga Sailo nizana thi chu an ui thu sawiin, MNF Party chuan an party banpui rinawm a tliak a ni an ti.

MNF Party chuan Pu Lalrintluanga Sailo chanchin an tarlan danin,, kum 1976 khan, kum 16 chauh niin 'Pathian leh kan Ram tan' tiin, India lak aṭanga zalenna sualtu MNF zawmin hnam sipaiah a tang a. A tawp thlenga awmin remna ziah khan a lo haw a, 2nd lieutenant a kai hman a. Overground politics-ah MNF tan ṭhahnem ngai taka thawkin nihna hrang hrang a chelh chho a, tunah hian National Core Committee Member a ni mek a ni.

Bible nema kum 16 mi lek a nih laia ram leh hnam tana a thisen far tawp thlenga inhlan Pu Lalrintluanga Sailo chu a intiam ang ngeiin a thih ni thlengin ram leh hnam tan a nung tih an thuchhuahah chuan an sawi a, Pu Lalrintluanga Sailo hi kum 2018 inthlanpuiah khan MNF Party ticket-in Dampa bialah MLA atan hneh taka thlan tlin a ni a. Kum 2023 khan he bial aṭang bawh hian hneh takin thlan tlin nawn leh a ni.

MNF Senior Vice President Dr. R. Lalthangliana chuan MLA Pu Lalrintluanga Sailo chu MNF Party tana mi tangkai anih thu sawiin a hmunruak luah khah a har hle dawn a ti a, party ang pawha an ui takzet thu leh ram pum huap pawha mi uiawm tak a nih thu a sawi. Pu Lalrintluanga Sailo hi Larsap Gen (Rtd) Vijay Kumar Singh leh Chief Minister Lalduhoma bakah party hrang hrangin an ui thu an sawi a.

Larsap chuan Pu Lalrintluanga Sailo chungte a tawrhpu thu a sawi a, Mizoram tana a hnathawh te an hriatreng tawh tur thu leh Mizoram in a hre reng tawh dawn a ni a tii.

Chief Minister Pu Lalduhoma chuan Pu Lalrintluanga Sailo chu an ui takzet tih sawiin Legislator tha leh taima, thusawi thiam leh debater ropui an chan chu pawh atih thu a sawi a, Sawrkar pawhin a tihtur apiang ati zel dawn tih a sawi.

ZPM Party President Pu Lalliansawta chuan MLA Pu Lalrintluanga Sailo thihna chuan a thawn thu sawiin mi tawngmang thiam leh Assembly session tih ngaihnamtu a nih thu a sawi a, an party chuan an ui hle a ni a ti.

Mizoram Pradesh Congress Committee (MPCC) President Pu Lal Thazara pawhin MLA Pu Lalrintluanga Sailo a kal ta mai chuan a thawn thu sawiin ram leh hnam kaihhruainaa mi thahnemngai a nih thu leh a bial te ngaihsak a nih thu a sawi.

Pu Lalrintluanga Sailo hi ram hruaitu hrang hrang leh pawl hrang hrang ten an ui thu an sawi a, BJP Mizoram chuan Pu Lalrintluanga Sailo, MLA Term hnih lai ni thei leh VC ah pawh Term li lai tling thei, khawtlang rawngbawlna-a inhmang tak a ni chuan Pa ṭha leh thil ti tak tak mi a nih zia a tilang an ti a, Mizoramin hetiang MLA, mi ṭha tak a chan ta mai chu a pawh a, MNF Party leh a chungte an tawrhpu takzet a ni an ti.

PC Party chuan Ram leh hnam tana thahnemngai taka an rawngbawlpui, Mizoram Legislative Assembly member leh Dampa bialtu ni mêk Pu Lalrintluanga Sailo chu an sun tak meuh a ni an ti a, Veteran Legislator, House chhûng leh pawn a mi thahnemngai leh inpe zo tak mai ina mi a kalsan thut mai chu Mizoram leh hnam tan chàna nasa a ni a, an ti.

Pu Lalrintluanga Sailo ruang hi vawiin khan Mizoram phurh thlen a ni a, Lengpui Airport ah mi thahnem takin an lo hmuak a, a ruang hi zaninah lumen a ni ang a, naktukah Luangmual Presbyterian Kohhran Centenary Hall ah vui a ni ang.

Pu Lalrintluanga Sailo hi a khawsik nasat avangin June ni 29 khan Delhi panpui a ni a, New Delhi Max Hospital-ah ni khat ward-a a awm hnuah ICU-ah dahluh a ni a, tha chhuak zo ta lovin nizan dar 9 khan a thi a ni.

<><><>

MZP PRESS CONF

Mizo Zirlawi Pawl MZP chuan fur khaw chhiat vanglai taka, NHIDCL Executive Director-in chawlh a la chu an hriatthiam loh thu sawiin Mizorama let leh tawh lo tura an hriattir thu leh NHIDCL chu kawng chhe thawm that nan thla khat chhung an nghah dawn thu an sawi.

MZP hian vawiin khan Aizzwl press Club-ah thuthar thehdarhtute kawmin, MZP President H. Lalthianghlima chuan Mizoram ei leh bar lakluhna kawng kal hleihtheih loh khawpa a chhiat laia chawlh la NHIDCL Executive Director Virendra Jakhar chu kawngpui chungchang sawipui tur pawh a awmlo a ti a, MZP chuan Mizoram ei leh bar lakluhna kawngpui pawimawh em em, kal hleih theih loh khawpa a chhiat laia NHIDCL hotupa ber Executive Director-in August ni 7 thleng chawlh ala daih mal chu hriatthiam har an tih thu a sawi a. Tun thla chhung ngeia NHIDCL-in an enkawl kawngpui chhe zual lai Motor kal theih tura thuam tha vat turin a phut tih a sawi.

<><><>

GOVERNOR

Larsap Gen (Rtd) Vijay Kumar Singh chuan ram leh hnam inghahna ni mai tur thalaite chu hruaitu tha leh danglamna thlen theitu ni tura an inbuatsaih lawk a tul tih a sawi.

Vawiina Mizoram State Bharat Scouts & Guides Chief Patron atana Mizoram Bharat Scouts & Guides State Chief Commissioner Pu H. Lalhmingthanga'n Durbar Hall, Raj Bhavan-a a lakluhnaah he thu hi sawiin Larsap chuan Scouts & Guides hlutna, inthununna leh rawngbawlnate zahawm a tih thu leh khawvela thalaite beihpui thlaknaa nghawng nei lian berte zinga mi a nih thu a sawi a.

Larsap chuan Chief Patron a nihna zawnah Mizoram Scouts & Guides hmasawn nana theihtawp chhuah a tum thu sawiin, Mizoram District hrang hranga khua leh school-a thalaite'n he hmalakna hi an zawm vek theih nana tan lak puiah kalkhawmte a sawm nghal a ni.

<><><>

CM

Ministry of DoNER hnuaia din High Level Task Force on Handloom & Handicraft, Nagaland Chief Minister Pu Neiphiu Rio kaihhruai chu vawiin khan online hmangin an thukhawm a. Member, Chief Minister Pu Lalduhoma pawhin a pisa atangin a zawm.

Chief Minister Pu Lalduhoma chuan he thutkhawmah hian thu sawiin India rama handloom lama hnathawk thei mihring zaa sawmruk te chu hmarchhaka awm an nih thu a sawi a. Hei hian Handloom lama hma a sawn zel theihzia a tichiang hle a ni a ti a. A taka chantir theih hmalakna tur, road map duan te, common Facility Centre neih tam te, hmarchhaka puantahtute training pek te, state leh state te inthlunzawmna tha siam te, hmarchhak product te quality standard pakhat hmanga branding kalpui bakah skill & design lamah thil thar (innovation) neih tuma hmalak te a rawt a. Khawvel hriat khawpa Textile Hub langsar takah hmarchhak state te chu an insiam theih a rin thu a sawi a ni.

He online meeting-ah hian DoNER Minister Pu Jyotiraditya Scindia Union Minister of Textiles Pu Giriraj Singh bakah hmarchhak state Chief Minister leh an aiawh Minister ten thu an sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Naktuk zing dar 7 leh a chanve-ah Chanchinthar puan leh a ni ang.

<><><>

VICE PRESIDENT

Prime Minister Narendra Modia chaun Vice president atanga bang Jagdeep Dhankar chu hriselna tha tak nei chhunzawm turin duhsakna a hlan. Vawiin khan social media ah he thu hi sawiin Pu Modia chuan Pu Dhankar-a chuan ram rawngbawl hna kil hrang hrang atangin a thawk a ti a.Heng zingah hian Vice President nihna pawh a tel a ti.
Puan tawh angina Vice President Jagdeep Dhankar chuan nizan khan a hriselna chhuanlamin a nihna atangin a bang a. Pu Dhankara hian President Droupadi Murmui hnenah banna hi a thehlutin a hriselna chu a ngaih pawimawh thu leh doctorte thurawn avangin banna chu a thehlut tih a tarlang a. A hna a chelh chhunga president thawhpuina zawng zawngah lawmthu a sawi a. Prime Minister Narendra Modia leh a thawhpui Council of Minister te chungah lawmthu a sawi bawk a ni.

<><><>

BANGLADESH AIRCRAFT

Bangladesh Air Force thlawhna chesualah mi 31 an thi a, mi 171 in hliam an tuar. Thudawn danin Air Force Training jet hi nimin chawhnu khan Milestone College campus chhungah a tla a. Thlawhna hian college building su in mitthi zingah hian pilot pawh a tel a ni.
Prime Minister Narendra Modia chuan Dhaka-a thlawhna chesual chu pawh a tih thu a sawi a. Vanduaina tawk chhungkuate a tawrhpuh takzet tih a sawi a ni.

<><><>